



AKTA SYARIKAT (PINDAAN) 2024

SOALAN-SOALAN LAZIM

POLISI 2 :MEMPERKUKUHKAN KERANGKA REHABILITASI KORPORAT

(A) Penambahbaikan peruntukan-peruntukan berkaitan skim perkiraan atau kompromi (SPK)

Apakah *cram down* dan mengapa ia penting di bawah kerangka SPK yang telah ditambahbaik?

Kuasa Mahkamah yang mengarahkan persetujuan kelas pembiutang (*cram down*) merupakan satu mekanisme yang membolehkan Mahkamah mengarah pembiutang yang menentang untuk bersetuju dengan SPK yang telah dicadangkan. Matlamat mekanisme ini adalah untuk memastikan bahawa syarikat yang berhadapan dengan kesukaran akan mempunyai skim yang berjaya dengan gangguan yang kurang dan pada masa yang sama memberikan perlindungan kepada pembiutang yang menentang.

Rang Undang-Undang Syarikat (Pindaan) 2023 ini memperkenalkan seksyen baharu 368D yang membenarkan permohonan bagi *cram down* dibuat kepada Mahkamah dengan syarat:

- Skim ini diluluskan oleh majoriti yang mewakili sekurang-kurangnya 75% daripada jumlah nilai pembiutang atau anggota atau kelas anggota yang hadir dan mengundi dalam mesyuarat itu
- Skim ini adalah adil dan saksama kepada setiap kelas pembiutang yang menentang dan tidak mendiskriminasi secara tidak adil antara kelas pembiutang.

Permohonan *cram down* mesti memastikan bahawa pembiutang yang menentang akan menerima sekurang-kurangnya nilai yang sama dengan tuntutan mereka yang telah diluluskan berbanding jika syarikat itu dilikuidasikan.